

Broj:L09-04/15
Datum:02.04.2015.

ZAPISNIK

Sa šeste sjednice Lokalnog ekonomskog foruma općine Žepče

Sjednica je održana 31.03.2015. godine sa početkom u 13:30 sati. Sjednici su prisustvovali: Općinski načelnik Mato Zovko, Predsjedavajući OV Žepče Muhamed Jusufović, pomoćnik načelnika za gospodarstvo i financije Namik Malićbegović, pomoćnica načelnika za graditeljstvo i prostorno uređenje Brigita Lovrić, direktorica RAŽ-a Branka Janko, direktor SMŠ „Žepče“ Zijah Malićbegović, ravnatelj Tehničko-obrtničke škole „Don Bosco“ Marinko Antunović, predstavnik „Bositex“ d.o.o Ferid Ajan, predstavnik „Prograd“ d.o.o Ašir Mehić, predstavnik „Frigošped“ d.o.o Edin Čaušević, predstavnik „California“ d.o.o Josip Jukić, predstavnik „Car Trim“ d.o.o Ermin Čirić, direktor JP Komunalno Žepče Mirko Šumić, predstavnik OZZ „Žepački rolend“ Emir Tutnjić. Pored redovnih članova LEF-a, sjednici su prisustvovali predstavnici Elektroprivrede HZHB Gordana Đuzel i Alojz Širić, Elektroprivrede BiH Asim Bajrić, firme gosti LEF-a, predstavnik „Velbos“ d.o.o Almir Šečić i „Vin-Metal“ d.o.o Vinko Katava kao i pomoćnik načelnika za opću upravu i društvene djelatnosti Ilija Barešić.

Ad1 Usvajanje dnevnog reda i zapisnika sa V sjednice LEF-a

Nakon pozdravnih riječi, usvojen je predloženi dnevni red kako slijedi:

1. Usvajanje zapisnika sa V sjednice LEF-a;
2. Tematska sjednica: Mogućnosti unaprjeđenja usluge opskrbe električnom energijom za privatni sektor ; mogućnost iskorištavanja jalove struje i dr.
 - Gosti LEF-a: Asim Bajrić (Elektroprivreda BH) Alojz Širić i Gordana Đuzel (Elektroprivreda HZHB)
3. Plan upisa učenika u srednje škole općine Žepče – podnositelj pomoćnik načelnika za društvene djelatnosti - Ilija Barešić;
4. Informacija o održanom sastanku privatnog sektora sa direktorom JP Komunalno-podnositelj RAŽ i JP Komunalno Žepče;
5. Informacija o uspostavljanju Centra za investitore i programa postinvesticione podrške u općini Žepče – podnositelj RAŽ;
6. Informacija o toku anketiranja poslodavaca - podnositelj RAŽ.

Nakon usvajanja dnevnog reda, jednoglasno je usvojen zapisnik sa V sjednice LEF-a.

Ad2 Tematska sjednica: Mogućnosti unaprjeđenja usluge opskrbe električnom energijom za privatni sektor ; mogućnost iskorištavanja jalove struje i dr.

Branka Janko (RAŽ) je otvorila tematski dio sjednice, predstavila goste i pozdravila sve prisutne. Gosti sjednice Gordana Đuzel ispred Elektroprivrede HZHB, Alojz Širić ispred Elektroprivrede HZHB i Asim Bajrić ispred Elektroprivrede BiH su pozdravili sve prisutne te napomenuli da žele saznati probleme privatnog sektora kao i odgovoriti na postavljena pitanja. Nakon kraćeg uvoda, otvorena je rasprava u kojoj su predstavnici privatnog sektora imali mogućnost da postave pitanja gostima.

Edin Čaušević, („Frigošped“ d.o.o)predložio je da se otklanjanje kvarova treba blagovremeno najaviti te da se treba prilagoditi radnom vremenu. Predložio je da se popravke vrše u jutarnjim ili poslijepodnevrim satima (nakon radnog vremena).

Josip Jukić („California“ d.o.o) postavio je pitanje čestog nestanka električne energije na području Brankovića kao i pitanje prelaska vlasništva nad trafostanicom financiranom od strane fizičkih lica.



**LOKALNI
EKONOMSKI
FORUM
OPĆINE ŽEPČE**

Tehničko tajništvo LEF - RAŽ

Ul Prva b.b. (Dom kulture Žepče)

Tel: 032 880 273

razepce@gmail.com

www.razepce.com

www.opcina-zepce.com

Vinko Katava („Vin-Metal“ d.o.o.) je postavio pitanje vezano za „vršnu snagu“. Istakao je da je njegov problem ograničenje na 22 kW „vršne snage“ kako bi ostao u II-tarifnoj grupi. Napomenuo je da je ranije upućivao zahtjev za povećanje snage električne energije prema upravi Elektroprivrede HZHB u Mostaru. Katava je također naveo da isti problem imaju i ostali privrednici koji posluju u Poslovnoj zoni XP Žepče. Također, je dodao je 22 kW malo za proizvodno preduzeće i da je za njih skuplje biti svrstan u I tarifnu grupu.

Almir Šečić („Velbos“ d.o.o. Žepče) je istakao da je firma „Velbos“ uložila svoja sredstva u finansiranje elektro linije Nemila-Begov Han prilikom otvaranja pogona za armaturne mreže. Također je dao primjedbu na način obračuna električne energije. Šečić je naveo da je privrednicima problem tzv. „povučena snaga“ („vršna snaga“) kao i oscilacije u naponu što dovodi do kvara aparata i opreme koju koriste. Predložio je da se isključenja najave bar jedan dan prije radova odnosno isključenja.

Nakon pitanja privatnog sektora, gosti LEF-a su odgovorili na postavljena pitanja.

Asim Bajrić (Elektroprivreda BiH) odgovorio je da je za rješavanje pitanja angažovane snage nadležan FERK. Predložio je da se uputi zajednički prijedlog privatnog sektora prema FERK-u u cilju rješavanja navedenih problema.

Gordana Đuzel (Elektroprivreda HZHB) je istakla da su korisnici Elektroprivrede HZHB kategorisani u tri tarifne grupe „Ostale potrošnje“. Prva tarifna grupa u kategoriji „Ostala potrošnja“ kojoj pripada privatni sektor predstavlja potrošnju iznad 23 kW u kojoj, primjerice „Car Trim“ ostvaruje znatne uštede u odnosu na drugu i treću tarifnu grupu gdje bi iznos računa bio znatno veći za trenutnu potrošnju.

Alojz Širić (Elektroprivreda HZHB) se osvrnuo na pitanje čestih isključenja. Napomenuo je da je pojava čestih isključenja u gradu posljedica sitnih kvarova. Također je dodao da Elektroprivreda HZHB koristi tri sredstva informisanja koja se koriste za obavješćivanje korisnika o isključenjima struje (radio, oglasna ploča, web stranica). Dodao je da su za Poslovnu zonu XP osigurana tri izvora napajanja električnom energijom. Širić je naveo da se problemi javljaju u rubnim područjima odnosno u području Ljeskovice i Viništa gdje je veća koncentracija firmi. Dodao je da će se i taj problem riješiti do kraja 2015. godine. Također je naveo da će se i problemi koji se javljaju na području Brankovića i Donjeg Luga riješiti u narednom periodu a do sada se nije riješilo zbog vremenskih neprilika i velikih ulaganja koje iziskuje taj proces. Naglasio je da se česta isključenja javljaju i zbog nevremena kao i zbog neodgovornog ponašanja pojedinaca. Najavio je i da će se na području Papratnice graditi još jedna trafostanica obzirom da su trenutni kapaciteti na tom lokalitetu iskorišteni. Kada su u pitanju prioriteti u rješavanju problema s napajanjem električnom energijom, Širić je naveo da će to biti područja gdje je veliki broj korisnika kao i područja gdje su česti kvarovi.

Asim Bajrić (Elektroprivreda BiH) je najavio da je u petogodišnjem planu Elektroprivrede BiH predviđeno osiguravanje napajanja električnom energijom sa 4 strane u području Žepče – Begov Han.

Ferid Ajan („Bositex“ d.o.o.) je predložio da se prema FERK-u uputi zahtjev za prijenos angažovane snage.

Asim Bajrić (Elektroprivreda BiH) je odgovorio da je prijenos angažovane snage moguć samo u istom trafo području.

Branka Janko (RAŽ) je postavila pitanje vezano za plaćanje industrijske struje za obrte, koje proističe iz Analize ankete o zadovoljstvu privatnog sektora uslugama javnog sektora.

Gordana Đuzel (Elektroprivreda HZHB) je odgovorila da samo kupci u kategoriji „kućanstva“ plaćaju nižu cijenu struje a da ostali kupci (privatni sektor) plaćaju tzv „Industrijsku struju“.

Općinski načelnik Mato Zovko je istakao kako je tema napajanja električnom energijom jako važna. Naglasio je da se na lokalnom nivou teško rješavaju problemi vezani za ovu tematiku ali da je dobro da se znaju problemi sa kojima se susrećemo na lokalnom nivou. Napomenuo je da su Elektroprivreda i FERK odvojeni subjekti. Istakao je da je važna dobra komunikacija i suradnja na lokalnom nivou iz koje treba da proisteknu inicijative ka višim instancama.

Vinko Katava („Vin - Metal“ d.o.o) je dodao da je adekvatan napon električnom energijom jedna komponenta razvoja firme obzirom da, u trenutnoj situaciji, preduzeće „Vin-Metal“ nije u stanju da nabavi opremu odnosno mašine koje su veliki potrošači. Istakao je da viši nivoi nemaju sluha za privatni sektor i njegove probleme.

Gordana Đuzel (Elektroprivreda HZHB) je napomenula da su od 01.01.2015. godine uvedene 4. i 5. tarifna grupa u kategoriji „Ostale potrošnje“ u koju su svrstane crkve, džamije, starački domovi, dječji vrtići i slično a da će invalidna lica (sukladno Zakonu o profesionalnoj rehabilitaciji, osposobljavanju i zapošljavanju lica s invaliditetom) koja otvaraju obrte struju plaćati kao kupci iz kategorije „kućanstva“.

Ašir Mehić („Prograd“ d.o.o) je postavio pitanje tačnosti informacije da će se od 01.01.2015. godine moći birati isporučilac električne energije.

Gordana Đuzel (Elektroprivreda HZHB) je odgovorila da će ta informacija najvjerovatnije od 01.06.2015. godine biti zvanična i da se u Elektro Žepče još niko nije javio sa zahtjevom za prelazak kod drugog isporučioca električne energije.

Zijah Malićbegović (SMŠ „Žepče“) je predložio da se i obrazovne institucije uvrste u kategorije 4 i 5 obzirom da i one plaćaju industrijsku struju. Napomenuo je da blizina trafostanice tik uz zgradu SMŠ „Žepče“ predstavlja opasnost po učenike.

Alojz Širić (Elektroprivreda HZHB) je odgovorio će se raditi na tome da se ta trafo stanica ogradi iz sigurnosnih razloga.

Na kraju tematske sjednice, Branka Janko (RAŽ) je informisala prisutne o javnom pozivu iz Ureda predsjednika FBiH a vezano za prijavu administrativnih neregularnosti i uskih grla u poslovanju i predložila da svi članovi LEF-a daju svoje prijedloge kako bi se prema Uredu dostavio zajednički prijedlog LEF-a.

Namik Malićbegović (Služba za gospodarstvo i financije) je predložio da se pored inicijative prema FERK-u, uputi dopis nadzornim i upravnim odborima obje Elektroprivrede što je i usvojeno.

Na kraju tematske sjednice, Namik Malićbegović se zahvalio gostima na svemu što su uradili tokom majskih poplava.

Zaključeno je da će se uputiti zajednički dopis prema FERK-u i nadzornim i upravnim odborima obje Elektroprivrede.

Ad3 Plan upisa učenika u srednje škole općine Žepče – podnositelj pomoćnik načelnika za društvene djelatnosti - Ilija Barešić;

Ilija Barešić, pomoćnik načelnika za opću upravu i društvene djelatnosti općine Žepče, u uvodnom izlaganju pozdravio je sve prisutne te naglasio da je Općina Žepče jedina općina u BiH nadležna za obrazovanje.

Napomenuo je da je ovogodišnji Plan upisa zajednički rad više institucija (Biro rada, RAŽ, Službe, škole). Istakao je da je ostvarena saradnja sa privatnim sektorom kada je u pitanju planiranje upisa učenika u srednje škole u Žepču a što je u skladu sa prijedlogom LEF-a, podnesenom na II sjednici LEF-a održanoj 22.04.2014. da se prilikom planiranja upisa učenika u srednje škole konsultuje privatni sektor. Obzirom da su RAŽ i Služba za gospodarstvo i finansije u toku procesa anketiranja privatnog sektora vezano za kadrovske potrebe, zamolio je predstavnicu RAŽ-a Berinu Grahić da kratku informaciju o zanimanjima za koja, do sada anketirane firme, smatraju da su deficitarna. Grahić je navela da su to zanimanja. krojač, zidar, tesar, električar, stolar, kuhar, konobar, zavarivač itd. Ilija Barešić je napomenuo da je prošle godine raspisan konkurs za ova zanimanja ali da nije bilo interesa od strane učenika.

Barešić je dao kratki osvrt na najbrojnija zanimanja na evidenciji Biroa rada Žepče. Napomenuo je da je trenutno 87 šivača na evidenciji Biroa rada ali da su to osobe koje su završile kurs te na taj način stekle to zvanje. Također je napomenuo da po nomenklaturi zanimanja ne postoji zanimanje šivač. Predložio je da se u Plan upisa uvrsti zanimanje krojač – šivač što su predložili i predstavnici tekstilnih firmi „Bositex“ i „Car Trim“.

Barešić je predstavio ovogodišnji plan upisa KŠC „Don Bosco“ i SMŠ „Žepče“.

Tehničko-obrtnička škola KŠC „Don Bosco“ za predstojeću školsku godinu uvodi kombinovano odjeljenje „Zavarivač – Limar“. Od tehničkih odjeljenja uvodi se zanimanje „Tehničar za mehatroniku“.

SMŠ „Žepče“ uvodi zanimanja : „Tehničar cestovnog prometa“, „Građevinski tehničar“, „Šumarski tehničar“. Od trogodišnjih zanimanja, SMŠ „Žepče“ uvodi jedno odjeljenje krojač-šivač i konobar-kuhar.

Barešić napominje da se učenici upisuju u škole odnosno smjerove koji se mogu kvalitetno pokriti teoretskim i praktičnim dijelom nastave.

Napomenuo je da je od ostalih zanimanja u SMŠ „Žepče“ ove godine predviđen upis prvih razreda za zanimanja: ekonomski tehničar, gimnazija, tekstilni tehničar, frizer, plinski instalater, bravar i vozač motornih vozila.

Općinski načelnik Mato Zovko dao je prigovor za upis prvih razreda za frizere. Direktor SMŠ „Žepče“ obrazložio je da SMŠ „Žepče“ ima svoj frizerski salon za praktičnu nastavu što olakšava učenicima koji bi, inače morali tražiti komercijalni frizerski salon za praktični dio nastave.

Predstavnik „Car – Trim“- a, Ermin Čirić istakao je da, po biznis planu ovog preduzeća, do 2021. godine predviđeno proširenje proizvodnih pogona i u skladu s tim povećanje broja zaposleni. Najavio je da će, u 2015. godini doći do povećanja broja zaposlenih sa trenutnih 1200 na 1600 te je 87 šivača koji su trenutno na Birodu rada mali broj raspoložive radne snage. Čirić napominje da Car Trim trenutno dosta radne snage uvozi iz susjednih općina Zavidovići, Zenica i Maglaj te da je je Car Trim- u od interesa da zapošljava ljude iz Žepča obzirom da je i ekonomski rentabilnije za ovo preduzeće. Čirić smatra da je 1 odjeljenje krojač –šivač nedovoljno obzirom na potrebe preduzeća „Car Trim“.

Također je napomenuo da se, na raspisani konkurs za upražnjena radna mjesta koja zahtijevaju visoku stručnu spremu, niko iz Žepča nije prijavio. Istakao je da tekstilni sektor u BiH ima stalnu tendenciju razvoja te da se isplati ulagati u obrazovanje kadrova za ovaj sektor. Također je napomenuo da je za rad u ovom preduzeću vrlo važno poznavanje njemačkog jezika.

Direktor SMŠ „Žepče“ Zijah Maličbegović istakao je da u SMŠ „Žepče“ trenutno ima 7 odjeljenja tekstilne struke (krojači i tehničari koji također imaju praktičnu nastavu). Ove godine završava 3 razreda a upisuju se dva nova te da tu činjenicu ne treba zanemariti. Maličbegović napominje da je školska radionica uz pomoć RAŽ-a i GIZ-a opremljena sa 6 novih šivaćih strojeva te da treba imati u vidu ove činjenice.

Marinko Antunović, predstavnik Tehničko-obrtničke škole KŠC „Don Bosco“ napominje da je problem malog broja djece koja završavaju osnovne škole te da treba početi aktivno raditi na popularizaciji zanimanja za kojima postoji potreba od strane privatnog sektora a učenici nemaju interes da se za njih obrazuju.

LEF je informaciju primio k znanju i najavio saradnju javnog i privatnog sektora u cilju prilagođavanja tržišta rada potrebama privrede.

Ad4 Informacija o održanom sastanku privatnog sektora sa direktorom JP Komunalno-podnositelj RAŽ i JP Komunalno Žepče;

Mirko Šumić, direktor JP Komunalno dao je prisutne informirao o održanom sastanku sa predstavnicima privatnog sektora. Napomenuo je da je u materijalima za sjednicu svim članovima LEF-a dostavljen zapisnik sa ovog sastanka te da stoji na raspolaganju da odgovori na eventualna pitanja. Obzirom da pitanja nije bilo **zaključeno** je da će na inicijativama sa ovog sastanka raditi RAŽ i JP Komunalno i o tome izvještavati LEF.

Ad5 Informacija o uspostavljanju Centra za investitore i programa postinvesticione podrške u općini Žepče – podnositelj RAŽ;

Direktorica Razvojne agencije Žepče Branka Janko predstavila je Program i Akcioni plan postinvesticione podrške ulagačima u općini Žepče u 2015. godini. Napomenula je da je RAŽ na usluzi svim poduzetnicima te da će se, Centar za investitore uspostavljen pri RAŽ-u pored ostalih, biti pružena i usluga postinvesticione podrške.

Istakla je da je pri realizaciji ovog Programa potrebna podrška i javnog i privatnog sektora.

Zaključeno je da se Program usvaja, informacija prima k znanju te da će LEF dati punu podršku realizaciji ciljeva Programa.

Ad6 Informacija o toku anketiranja poslodavaca - podnositelj RAŽ

Berina Grahić, ispred RAŽ-a, dala je informaciju vezano za tok anektiranje poslodavaca o kadrovskim potrebama. Istakla je da je, od planiranog uzorka od 100 firmi, anketirano 50 % te da će se anektiranje nastaviti u mjesecu aprilu. Također je prisutne informisala o preporukama poslodavaca zabilježenim u toku anektiranja. Preporuke se odnose na: poboljšanje praktične nastave, praktično znanje stranih jezika te prilagođavanje upisne politike razvoju privrednih grana i potrebama privrede.

Branka Janko je najavila potpisivanje Sporazuma o saradnji između RAŽ-a, LEF-a, Biroa rada, općinskih službi a koji će se odnositi na saradnju glede zapošljavanja, formalnom i neformalnom obrazovanju i slično.

Na kraju sjednice, Edin Čaušević pohvalio je letak o javno-privatnom dijalogu koji je izradila Razvojna agencija Žepče.

Ašir Mehić je predložio da se, zbog obaveza predstavnika privatnog sektora, sjednice zakazuju u popodnevним satima što je i prihvaćeno.



LOKALNI
EKONOMSKI
FORUM
OPĆINE ŽEPČE

Tehničko tajništvo LEF - RAŽ

Ul. Prva b.b. (Dom kulture Žepče)

Tel: 032 880 273

razepce@gmail.com

www.razepce.com

www.opcina-zepce.com

Sjednica je završena u 15:30 sati.

Zapisnik sačinila

Berina Grahić

Berina Grahić


Predsjednik LEF-a

Namik Malićbegović